

Christian Meivah



January - February, 2020

Lhani seh thuso

Private Circulation

Kum Thah 2020 ahung tai

Kum thah akimu tengle ilung akipah tei jie. Thanop jong aum jie. Ikipana pen diu chu ahile, Pathen in kum thah sunga eipui lut-u chu ahin, Pathen thangvah ngai ahi. Kum lui sunga insung mi thina toh ho din gol nop mong mong aumthei jipoi. Ahin la asanje het ngai ahi.

Bible a Ruth kitinu hinkho gel thei ahi. Amahi Israel ten adonse lou mun Moab a hung khang doh chule hikoma jinei khat ahi. Ruth in ji anei in, ahinla cha anei masangin ajipa anathi. Lung hem tah in, aninu toh ahung kivah in, Pathen atahsan in nupi phatah khat ahi. Ama hin khoa kona melchih ding khat chu, aji athi phat a a-ina akile louhel chu ahi.

Isaiah lekha bun hitin ati, “Pakai in asei in, ‘Thusim lui-a kingai dauvin, thil sohsa chu lung monpi dauvin. Thil thah kabol got hi kailhit jouvin, ... gammang lai a lamlen seming ting, twi don ding napeu vinge’” anati. Ruth in atehpi Naomi akilhon pin, agenthei khom lhonin, khonungin Pathenin Ruth din mipha Boaz chu ajipa ahisah tai. Ruth in Pathen aheth jah a chanpha changa

cha jong ahin nei ahi. Kum thah a lutte jong lunglha poute. Pathena idet pou ule Pathenin idiuva pha hin gel nante. Hijeh chun tukum 2020 in pa Pathena kipelut cheh ute. Pathenin “gammang lai-a lamlen seming ting” hinged, tin asei-e. Pathen hi ahitheilou jong hisah thei ahi, tahsan ute.

Caesarea a cheng Rome sepai Cornelius (Acts 10) jong gel doh thei ahi. Ama hi jalamkai khat ahi. Cornelius hi Jew lah a anacheng in, chule hiche lai chun Rome te atam jon Jew ho hi ana veneo ui. Ahinla Cornelius hi mipha, mi jaje he mi ahin, aman Jew ho chu ana lungset in ahi. Aman Jew te Pathen jong ana tahsanin, Pathena taohat khat jong ahi.

“Koi hile Christa toh hing khom chu thilsem thah soh ahitan, atila kistem masa chengse kitolmang ahitai, ven, thil thah asoh tai” (2 Cor. 5:17) tia kisei banga, thil jouse thah ahitai. Cornelius hin Peter a kona Jesu ahin tahsan ahi. Tulai hin minu mipa phabep in achate henga Jesu thu asei man pouve. Hiche hi ilhahsam nau ahi. Chate Pathena hatsah tei ding ahi. Khonunga anu apa hinve dingle hin vah ding amaho ahieuve. Chate dia taojing angai-e.

Hinhko thah kidang

2

Pathen thu theng lekhabu sunga Kitepna Lui hi Israelte leh chidang namdang hinkho umdol kijih thupeh ahin, aheth baina aumin, hiche hinkho umdan hi Pakai Jesu tahsan jala Lhagao kipe Christian ho umdan hin, ipi asosah ding hi kinep naa sohcha ihuvin, sochatna hinkho dih-a hindan kiphong doh vetsahnaa hing ihuive (Rom.8:18-30, Isa.65:17-25).

1. *Pakai Jesu hung kit ding* : Israel ten lhenchom ahi nauva, akinep piu chu, leiset chonset dimset hi Pathenin akhel doh-a, thilsem thah hung umdoh ding ananga lelu ahi. Akinep lonau chu Pathenin alhen doh jeh-u ahi. Hiche lhenchoma aum nau, photchetna chu, hinkho thenga ahin nauva gim genthei jouse athoh diu, akhon naa athoh gau amu tei diuva kinem ana hieuve

Pathen dei danthu sei banga hinkho aman lhum kei-u leh Pathen in thilsem thah asem dohnaa lut diu, athoh na jouseu sanga tonsot nopna hinkho chang dinga kinema ‘Pakai Nikho’ ana ngau ahi.

2. *Israel kinepna chu* : Solchah Paul in Israel te ana kinepna chu Christian te chang dinga asei doh ahi. Israelten lhenchom ahinau pansatna anei-u banga, Paul in Pakai Jesu tahsan hi, akinep piu Israel ten lhenchomna akisonpiu asei doh-a, chule Pakai Jesu tahsan jala, Lhagao kipe

hon, gim genthei athoh diu aseidoh ahi. Christa tahsana gim le genthei kithoh jouse chu akithoh lhum kei leh Pakai Jesu ahung kit-a, hung ki phong doh ding nopna hinkho kisei chutoh tekah hoi ahilou asei-a, hi che dia kinema Pakai Jesu hung kit na nikho chu ingauva asei ahi.

Pakai Jesu hung kit teng, ki phong doh dinga ingau nopna hinkho chu Pathen peh ama Lhagao in eipui uva, hingho ding ahin, Jesu min a hilou gim genthei thoh mana kimu ding ahipoi. Nopna mutheina dinga Lhagao-a hin ding kisei doh joh ahi.

3. *Pathen Lhagao kisonpina* : Israel ten lhenchom ahinau akisonpiuva, Pathen peh Danthu ajui lou jeh uva, kinem tah-a angau ‘Pakai Nikho’ atiu chu manthahna leh ka le mao nikho joh-a, anei-u ahi. Hiche banga hi, tulai christian teho jong, Pakai Jesu tahsan jala eikipeu va Pathen Lhagao nei cheh-a, kisonpia, chule hiche isung uva cheng Pathen Lhagao sei dung jui-a hinkho manglou iumkhah uleh Pakai Jesu ahung kit teng hinkho nom muding kinepna chu ka le mau nikho joh hung hiding ahi. Kiging phaute.

Jesu tahsan jouse Pathen Lhagao kipea, hiche leiset chonset na toh kidouva, gim genthei kithoh ho jeh-a, Pathenin nopna hinkho eipeh diu ahapon, Lhagao eipeh uva cha lamthua eikisem jeh uva ithoh diu joh ahijoi. Ajeh chu Pakai Jesun

athohna jouse chu, Pathen chapa hina jeh-a ana thoh-a thi ahijon, Pathen chapa hina dia athoh-a thi ahipoi. Sopite, Christa itahsan uva Pathen in eipeh-u Lhagao chenna christian ihi jeh uva Jesu banga ithoh na diu jouse hi khonunga nopna hinkho chutoh tethei hoi ahi lou dan Paul in asehi banga, Lhagao pui-a Pathen dei hinkho joh-a ihiin diu ngai ah ahi (Rom.8:18). *-Dr. T. Lunkim*

Khonung Thuding

Lhoh neiho lung suhto dol in, leiset-a khonunga hung soh ding themkhat veleu hen, ikininna diu jong himai thei in aume. Amaho ginchat dol ahin sutdoh-u chu :

1. *Khonung* tengleh gari hi aset leh semkit ngailou ding, gari kistem phat na mun (Auto repair workshop) umlou ding ahitai.
2. Tua kimang Petrol ahiloule Diesel gari ho hi koiman hinmang taponte. Mi jousen electric gari hinmang tan tin, chule aset jongle minit 10 sunga asem phat jeng diu ahitai. Tua i-gari neiho hi a-parts 20,000 vel ahin, aset leh akisem phatna phat luttah ahi.
3. Petrol kithal bena mun ho (petrol pump) hung um taponte. Ajeh chu electric gari hi sum lhomchaah lhai thei ahi.
4. Electric Meter hi lampam hoa hung um ding, electric iman ho aki chai teng hia chu idehi phat phat a aman peh-a mei i-ina vah sah thei

hung hi ding ahitai. Tua lampam dukan khat a thil khat ikichohpa to banga, bai ding ahitai. Electric bill pehna dia din din hung ngai lou ding ahitai.

5. Electric Motor ho aset tengle ajoh hon asem phat tah lou ding, amun amuna asem dia kinganse ten Robot joh asemphat loichal sah diu ahitai.

6. Gari thah sem nom hon dukan thah ahon nom uleh (auto manufacturers), electric gari bou asem uva ajoh diu ahitai.

7. Leinoi meihol (coal) kimang talou ding, chule gari engine anaalna dia kimang ji thao jong hung kimang lou ding ahi (gasoline).

8. Min ama ama ina electric meitha akisem cheh-a (electrical energy) chule aman val diu ho chu akijoh ji diu ahitai.

9. Tulai a min ama ama dia gari akichoh ji hi umta lou ding, ama ama dia akichoh gari hohi phat khat leh museum joh-a hung kimu ding ahi tai. Ajeh chu gari parking mun kimu jou tapon tin, parking ding gam bei tading, chukitle gari hi iman nom tengle phone akibol leh chom cha khat jouva ikom hung lhung jeng ding ahitai (tulai taxi sanga gangjo ding).

10. Kum 1998 lai chun Kodak Co. hi aminche lseh in, natonga agoi mi chu lakh ni alhing deh in, ahinla phat chomkhat jouvin Camera jong hung ngai talou, Mobile joh in ima jouse ahin bol thei chun, Kodak te chu deficit achevin, tun athi tan ahi.

11. Gari accident hung um behseh pontin, hijeh chun Insurance Co. ho jong bei ding ahitai. Ajeh chu gari ho satellite in ahin puile ding, akisuhmona lhom cha hiding ahi.

12. Electric bill lhomcha cha hung hintin, electric gari ho jeh in hui jong hung theng ding, nisa a kona electric mei hung kimang tading ahi.

13. Damlouna aum tengleh Mobile a thu kikija mat toa, a-company te manchah chun apet pet-a, ithisan, leh adang dang Mobile vanga aki lah doh uva, natna chu gangtah-a amat doh ji diu ahitai. Hospital a phat tamtah tah suhmang umta ponte.

Vannoi thepna chihna khan tou jeh-a ima jouse hung bailam ding ahi. Tulai a i-ina kona thil idehi dei kikichoh theina sanga, hung phajoa hung gangjo ding ahitai. Hoi lai ham khat a nache nom jong leh Drone nakouva, tola chelouva van a nalam lhah a, chomkah a nachena mun nalhun loi jeng ding ahitai.

Pathen manchah thei mi

‘Eihat sahpa vanga ijakai bol thei kahi’ (Phil.4:13). Mi loi khat in thu asehi-a, lekha asut teng leh thu chu agilna thei pena sut ding le sei ding agut-u ahi. Mi loi khat kit chu, akisehi sasa chule mi het sasa goltoh toh-a sei, Jesun asehi-e, Paul in asehi-e, Bible bung hijat chang hi jat-a akisune, tia thu ahethet goltoh

toh-a sei-a suna aume. Amaho ki sim thalou, mi thusim holkhom khom a seiho ahivu. Keima hi Pathenin eimanchah hinam, ole keile kei ki-engbola kahi ham, kikhol ngai ahi. Achuti loule Saul lengpa ki-engbol tobang bep kihi ding ahi.

Pathen manchah mi masa ho chu - Noah chu sochatna kong sem dinga Pathenin amanchah a anganse ahi. Hijeh chun aman thina tuipia konin aji acha leh ganhingte ahuhhing in ahi. Eiho jong Pathen in huhhingna thupha seidia eingan seu ahin, koi koi nahuhhing chule naji nachate nahuhhing hitam, ngaiton ! Abraham chu Pathenin akouvin, Canaan gam lodin asolin, amang chan Canaan gam chu analo tai. Nangma la, Pathenin nakou hinam, van Canaan gam, Pakai Jesu mun sem, lo dia nanganse chu naki het hinam ? Midang jong hikoma chu puilut dia nakinganse ahi chu nasuh millou beh hinam ?

Mose chu Egypt te soh a kihen Israel te puidoh dinga Pathen in akouva anganse a amanchah ahi. Nangma chu chonset soh-a kihen ho puidoh dinga Pathenin nakouva nanganse a naman chah nom chu na het hinam ? Satan khut a soh chang mi ijat napui doh tah em ? Insung mipa insung luchang ahi. Christian jouse hi Pathen nanganse ahin, mi huh hinga pang dia anganse ahi. Abanin Pakai Jesu manchah ho veute. Jesun seijui 12 ho chu kipana thupha sei

din akouvin, asolin, amangchan ahi. Pentecost nikho chun chung a kona thahatna, kisonna, hanna jong ana pei. Thahat kitia hin thil kidang bol theina apange. Peter chun khat vei thu anasei-a ahile mi 3,000 chu Jesu akisan sah jenge. Jesun Peter heng a, nang hi song tobang nahi, nanga kona ka Houbung kaphu doh ding ahi, ati peh bangin, Peter mangchan Jesun ahoubung aphudoh sah tai. Vo, hou natong, nangla Jesun nakou hinam ? Ole nang ki-engbola pang nahim ?

Solchah Paul chu Pakai in akouvin, amangchan Asia gam chule Rome gei in houbung ana phutdoh tai. Hijeh chun kana seisa bangin, Paul in asei-e, Peter in asei-e, Bible a akisune, tia mi hil hil sangin, kei man katonge, kasei-e, tia seiding nanei hinam ? Pakai in anatong ding mi akou jinge. Huhhingna chang dia mitin kou ahi.

Pathen manchah dinga ki kou ho chu, Rev., Pastor, Missionary, Evangelist chule houbung upa ho tia ngansena kipe hohi adeh-a Pathen manchah dia kikou ahiuve. Amaho lah-a Pathen manthei lou jong aum kha jie. Pathenin adeh-a amanchah nom ho chu :

Paul tobang Pathen kouna chang ho ahin, Paul in keiho hi Pakai toh tong khoma akithopi kahiuve, anati (2 Cor.6:1). Jesun seijui ho henga Jerusalem dalha hih lai un, thilbol theina kapeh diu chu ngah tadiuvin, atin, hichu Pentecost nin achang ta uve. Chuti ahile Pakai na tong ding

ho chu, ama to tong khom ding ho chu Lhagao thilpeh chang ho ahiu angai-e. Hijeh chun Paul in, eihatsah pa vanga ijakai bol thei kahi, ati ahi. Pathen natong kahi, tia houbunga lamkai a pang ho jong, Jesu dia ki katdoh kipedoh nailou aum leh ama ho chu chinghen them jong leu, Pathenin aman chah louhel diu hetsa ahi. Solchah Paul in, Christa Lhagao neilou chu Christa ahipoi, ati banga Christa Lhagao neilou, peng thah lou ho chu Pathenin iti aman chah thei tah ding ham !

Mi abangin kapeng thah tai, atiuvin ahinla ama dei dei in thu asei un, avah len, akitah hih un ahi. Mi kitah lou, lung thenglou, sum ngailu miho chu Pathenin amanlou ahi jenge. Amahoa konin ima gadoh ponte. Bible, theology gasim te ho abang bang jong Jesu phatea atah san lou jeh un Pathenin amangcha thei ji pouve. Hijeh hin Pakai Jesun, Pharisee ho nanghon Pathen lekha bu naholun nasutoh toh jiuvin, asung a tonsot hinna uma nangaito jeh un, kahenga nahung nom pouve, tin ana sei-e (John 5:39).

Theology sima thepna nei Jesu tahsan ho chu, solchah Paul Pathenin amanchah banga aman chah jiu ahi. Thepna kiti chu thilbol theina ahi. Hichu Pathen in aman chah a, amaho chu natoh lentah tah atoh sahji ahi. Hijeh a hi thepna chih na nei vanga kiletsah ding ahipoi.

- (L) Rev. Seikholen Lenthang

Jesu hinkho phabep

Jesu thusei a konin Pathen lenggam itobang ahidem ti ihedoh uve. Aman Pathen lenggam anai mong tai anati. Pathen lenggam hi mi tamtah in agel toh hung bang lou ding ahidan jong ana sei-e. Leinoi a thilmu khat akitu tengle ol-ola ahung khandoh toh bang din asei-e. Hitia anasei chu angaite hon aheth pehna diu vem, akihe poi.

Ahung gollhan dom phat chun, akhomi Nazareth ten ana thei nom tapouve. Hiche lai chun Baptist John hi Herod lengpa thu peh in alol ana kitan tan, Pathen thu ana seijom tapoi. Hijeh chun Jesun akho ada lhan Pathen thu ana lhang sam len, thil kidang ana boltan, chuin mipi hon ama chu leng khat in aphong doh nomun, ahinla ama ana nompoi.

Themgao Isaiah in ama hung ding thu anaphon ji chu Jesun miho hengah anasei jin ahi. Akhoa Pathen thu seiphonga ana chea, hou ina (Synagogue) akikhop nauva mihon Isaiah themgao sutdoh lekha jol chu ana peuvin, aman jong hichu alham lhan, Isaiah in ana sut doh Isai. 61:11-12, Luke 4:18-19 chu ana simin ahi. Chuin aman akikhom ho koma, ama natoh apipen chu hi che Isaiah thuseisa chu tongdoh a hung ahidol ana phong doh in ahi. Tahbah in milham hon vaicha gen theite adon pouve, ahinla Jesu chu akihen ho lhadoh dia, mit thopte kho musah dia, chule vaicha genthei

ho henga Kipana Thupha lhun sah a hunga ahi. Hichu Isaiah in ana sei dohsa ahitai. Lekha jol chu asim chai chai in, apepa chu anung peh in atoutan ahileh mipin ama chu anave veuvin ahi. Chuin aman “Hiche najah-u Pathen lekhabua thu hi tunia guilhung ahitai” anati (Lk.4:21). Iti dana Nazareth kho neochaa thingthem bol (carpenter) a pangji pan, Pathenin athu seido-a angan sena asei ham, tia akikhom ho chu lungdonga ahi.

Chuin Jesun, “Dihtah a ka seipeh nahiue, themgao chu akho sunga i-kisahji lou mong ahitai” tin asei-e. Hitia akisei doh phat chun akikhom ho alung hangun, Jesu chu khopam lamah alhoh doh un, mol vum koldeh-a sot lhah a thisah din anapui tauvin, ahinla ahethman lou kah un, Jesu chu ana jammang doh tai (Lk.4:20-30). Nazareth miten ama chu ana tahsan louhelu ahije.

Israel chate chu Rome vai pohna noi-a genthei tah-a, ahin lai-u ahijeh chun, lamkai pha aloupi Messiah hung ding ana galdot jingui. Baptist John chu alu akitana akitha thu chu Jesu henga John seijui hon ana sei tauvin, Jesun nommo ana salheh jengui. Alung lhah jeh chun munthip khat jonin, kong khat-a ana touvin, mipi kikhom ho chu adalha tai. Ahinla mipi phabep in aumna lam chu ana jon tauve. Amahon Jesu hi aholdoh un, hikoma chun Jesun ana adamlou phabep jong adamsah-e. Hiche nilhah lam chun Jesun chang

lhah pheng nga leh nga ni mangchan mi 5000 oi anavasah in ahi. Chuin mipi chu adalhan, munthip a anatao vin ahi. Hiche lai hi 29 A.D. hidin tahsan ahi (Mt. 14:3-22). Mipi hon ama hi Messiah ahi monge, leng chan sah ding ahi, tin anagel tauve. Nikhat lengpaa phondoh ding ati laitah un, Jesu chu amaho het loukah in a jam mang doh tai (John 6:14-15).

Pharisee holeh Danthu them ho Pathen nato dan chu Jesun aki phat lhem sah a aseidojeh in, ama hon Jesu avetda tauve. Jesun atekah na in nule pa jabol thudol leh kam sunga kona kiseidojeh thudol ho ana sei-e (Mt. 15:2-20).

John Baptist thi leh mihon Messiah ahisah chule Pharisee ho lung tagna ho hin asuboi tan, hijeh chun mun thip a ana jam jie. Nivei jong Galilee ana dalhai. Mi akivoppi theilou hoa kona akikhin dohna ana umjie. Pakai Jesu hi vannoi dia hung ahi ti hetna chu chi le vah thu aseidojeh konin akihei (Mt. 5:13-14).

Van Gan jotna dia

Van gam jotna dia het tei ngai ho phabep veute. Heb. 3:1-9 in Jesu hi achung nung penin aseidojeh. Chule Heb. 4:1-16 a, choldo thu, Pathen thu nit tei ding, chule Jesu bou van gama eipuilut thei-u ahi, ti imuve. Choldo thudol ah, Pathenin thilsem jouse asem chai-a akicholdo thu imuve (Gen.2:2). Pathen choldo

kisei hi Pathen thachola choldo tina ahipon, thilsem akichai tengleh Pathen le atahsan ho noma umjing dia aseidojeh geljoh ding ahi. Ajeh chu Pathen le atahsan ho dia hahsatna beita ding ahi (Rev.21:4). Thilsem ho abei teng satan le Pathen tahsan lou (atahsan dihlou) ho chu tonsot a gim genthei thoh a umjing diu ahi (Mt.25:41).

Van gama tahsan dihte pui lut thei Jesu bou ahi. Pathen tahsan hi amichang cheh in abol ding ahin, atahsanna thei chu Kitepna Lui a anakisei masa, atah ahina chu Jesun atoh molso ahidan tahsan ding ahi. Pathen choldo mun lhunna ding thudol Kitepna Lui-a kiseidojeh lah gop-a tahsan chaina Jesu amatah in ahung toh chai ahitai. Jesu tah sana van gam jot hi thilbai ahipoi (Mk.8:34). Hiche hi Israel miten Canaan gam ajot uva kum 40 athoh nau tobang thim chu ahi.

Van gama eipui lut thei-u Jesu bou ahi. Alampi chu Jesu ahin, ama thu tuhdet jinga lhaso louhel ding angai-e (Jn.14:6). Van gam jot lai sunga, ngaichat jouse Jesun ei peh thei-u ahidol Canaan gam jona che Israel ten kum 40 sunga angai chat jouseu Pathen in anapeh a kon in imudoh thei ui. Van gam jot pet in ipi ngaichat chule itobang tohkha jong leu hen, itahsan pou ule Jesun van gam ilhun sah tei diu ahi. Pathen chapa Jesu tahsana chule twi ilut niuva pat a, Pathen choldo (Sabbath) mun ilhun teina dia ama thu

hil ho nit a chule juijing jeng ding hi ahipene. Hinkhoa toh doh ding akhoh pen chu, ama sei nit hi ahi. Ama toh killhona lam jot jouse chu van gama lut tei ding ahi. Moses chun Israel te Canaan gama apuilut thei pon, ahinla atahsan ho Canaan gam alhung cheh ui. Pathen manchah mai-mai mihem sanga, Jesu achung nun dan akilang doh in ahi. Hijeh a hi, tulai christian hon Jesu phatah-a itahsan pou ule van gama ilut thei diu aume. Kikhoh utin, phaten Jesu tahsan utin, ama thu nit uhite.

Chonset pohgih napoh chu

Chonset pohgih ipoh jing pau hi, eilah doh peh thei diu Jesu bou ahi (2 Sam. 9:1-13, Lk. 6:27-36). Chonset pohgih pohmang peh thei Jesu koma lhutna ding hi taona bou ahi kit-e. Eipoh mang peh thei na dia Jesu hi tahsana athusei ngai ding ahi. Chonset in mi ho lungdon gim gentheina apei.

Anachonse pule pi Adam leh Eve thisan, amani chonset gui-a peng jouse koi hijongle ama chu chonset lungdon gimna le gentheina toh pentha ahung hi. Hinlai dam sunga bolkel tohkkel jeh-a lungdon lunggimna kitoh ho hi chonset penna gui-a chonset lungdon leh gimna aki nei jeh ahi. Tahsaphe thisana beh chonset lungdona kona damna thei chu chonse mihemin akibol doh thei poi. Ajeh chu chonset lungdon gim pomang thei Jesu bou ahi. Jesu bei a chonset lahdo hithei lou ahi.

Pakai Jesun, “Tong gimte le pohgih te kahenga hung un, keiman choldo sah unge” anati (Mt. 1:28). Hiche aseidojeh a kona ihet diu chu, ama bou chonset pohgih pomang thei ahi na aphon doh ahi. Leiset mihem in ahinkho sunga vannoi chonset pohgih jouse agim pia apoh tei tei ahi jong Jesun aseidojeh in, ama thoh banga thoh din, eihilojeh tauve (Mt. 11:30). Jesun alung sunga eiho jouse pohgih apoh banga, chonset pohgih chu atahsan ten jong apohje aheth uva chule tahsaphe chu thita jongle ahin doh kitna dia, Jesu chu thia hing doh kit anahitai (Rom. 5:6).

Eibolse te ngailut a, aman apha adei igeldoh chan, ijo chana bol peh ding ahi (Lk.6:27-31). Ngailut gui chu tansah louva ngailut tei tei ding, chu Pathen mi lungsetna, David leh Jonathan kah-a gutan thei lou ngailutna tobang chu nei ding ahi. Mihem in Pathen thupeh palkeh ta hen lang, Lhagaova thilo hel jongle Pathenin vang mihem angailut hi abei thei pon, atahsan chan chu mangthai louva tonsot a hinna Lhagaolepeh kit din, achapa changkhat seh Jesu chonse te hinna din, eina pe tauvin, chule Jesun eithi peh un chu in ahing doh kitan ahi (Jn. 3:16, Rom.5:6). Kipana Thupha (Gospel) itiu hi Jesun chonset lungdon gim eipoh mang peh laitah-uhidojeh kiseidojeh ahi. Jesun apoh mang vanga eiho toh ding bei-a gel ding ahipon, aseidojeh ngai-a aman chonset pohgih apoh banga eihon jong ipoh diuva eihilojeh ahijoi (Mt. 11:29).

Pathen leh Science

University a science professor khat in student ho chounan hitin ana sei-e. Akimu jouse hi Pathenin asem mong ham ? Simlai khat in, “Pathen sem ahi soh kei-e” ahinti. Pathenin asem mong ham, tin simlai pa chu aledoh-a ahile amapan, “Yes, sir” tin adonbut-e. Chuin ojapu chun, “Ima jouse Pathen sem ahileh, ase a phalou ho jouse jong ama sem ahi” ahinti tai. Ojapu chu akipah lleh in, christian ho Pathen hou jong hi adihlou ahi, tia Pathen tahsan lou ojapu chun adinpi ahi.

Chuin student khat ahung ding doh in. “Ojapu, thu khat na dong inge. Adap (cold) hi uma ham ojapu, ahinti. Ojapu chun, ‘Ipi dia hichu neidoh khoh ham, adap kiti hi aumnai. Dap nasah khah lou ham?’ ahinti. Simlai pa chun, “Ojapu, adap kiti hi aumpoi. Physics kasim dung jui in, eihon adap itiu hi asa bei tina ahi. Asa inei lou tenguh leh adap kiti thucheng hi imanchah-u ahin, adap kiti thucheng hi eiho semthuh ahi bouve, ojapu” ahinti.

Simlai pa chun, “Ojapu, mu thim kiti hi um em?” tin ahin dong kit in ahileh ojapu chun, aume, atin ahi. Chuin simlai pa chun, “Ojapu, nasei khel kittai. Muthim hi aumpoi, muthim itiu hi vah aumlou jeh ahi bouve. Vah chung chang hi ikhol ji thei ui. Ahinla muthim hi koiman akhol doh ji poi. Newton Prisom

akiman chah tengleh vah akang set chu jem (colour) tampi aki sosah thei in, hiche jem ho chun ichan chan ajot uvem, ti jong akikhol leh ahah danu akibang kit poi. Vah aumlou tengleh eihon muthim kiti thucheng hi imanuh ahijoi. Ahileh ojapu, ase a phalou hi um em?” tin anadong kit tai.

Ojapu chun, “Ase hi aume. Mihem ho agilou atamin, amahon ase ho abol uve” tin ahin sei-e. Simlai pa chun, “Ojapu, ase hi aumpoi. Ase kiti hi Pathen umlouna mun het sahna ahi. Muthim leh adap tobang bang ahi. Pathen umlouna ahi teng mihon asemdoh ‘ase’ kiti thucheng hi amanchah jiu bou ahi. Mihem ho lung sunga Pathen achen lou hetna thucheng ahi. Pathen lungsetna um louna mun ahi. Asa aumlou teng hung dapji tobang chule vah aumlou teng muthim hung umji bou ahi” tin ana sei-e. Hichu ajan, professor pa chu thip beh in akunin atouvin, ahitai. Hiche student pa min hi eihon, Albert Einstein tin iheuve. Ama hi scientist minthang khat ahung hitai. Akinel na lhon kum hi 1921 chu ahi.

Daya Sagar film

Christian film Daya Sagar a Jesu anahipa chu, tu naicha chun hanat in anan, chuin Jesu akisane. Jesu akisan jouvin adam doh in, tu lai hin hatah in Evangelist na atong tai, ti akijai. Ama hi Tamil, Telegu, Malayalam movie hoa actor anahi. Amin hi Vijayachander ahi.

Nui-hi damna (Prov.17:22)

* *Tongmang in agolpa henga* : Idia tuchung na exam mark hibanga lhoma hitam ? Agolpan : Mi khat hung lou jeh ahi, ati. Nangma chelou jeh ham ? atileh agolpan, ‘Ahipoi, kakoma touji pa ahung pan lou jeh ahi’ anati.

* *Gari check bol police pan* : Na gari lekha ho abulhing nai. Ahinla fine Rs. 2,000 napeh angai-e, achu ti loule nakilha ponte, atin, gari nei pan ajeh adoh leh ‘Tulai hin plastic akikhah tan, nangin na gari lekha ho plastic a nahin chun ahi’ atitai.

* Ojapun chapang ho henga, “Tua thudoh kahin doh ding hi dih chet-a eidonbut pen chu a-ina chethei ahi tai’ atin ahileh chapang khat in a le kha buho apohna Bag chu kotchaa asonlhai.

Ojapun hichu amun ahenga : Idia na lekhabu bag chu naselhad ham, tia adoh leh aman ina kache ding ahitai ahinti. Ojapun, idia nache ding ham, tia adoh leh aman, ‘Na thudoh dihchet a kadonbut ahitai’ atin ading doh in achetai.

* Miguchapa chu court a ahinpui un, Judge pan, “Idia hichete ina chu nagalut ham?” atile aman, “Pu kei themmo ahipoi. Inneite chun polam a ‘Welcome’ kiti khat atah jeh-u ahi. Thilgua che jong kahipon, ka luttah jeh a melchihna khat beh kichoi ding kanagot jeh ahi” ati.

* Khovah leh muthim kikhehna ipi ham, tin ojapun school chapang ho

class a chun ana donge. Chuin chapang khat ahung ding doh in, “Ojapu, electric switch jeh ahi” anati.

* Inneipa office a konin nilhad in ina ahungin, touna atouve. Ajinun cha adon ding ahung pei. Hiche pet chun achapan, Mark Sheet khat apa ana pen ahi. Apan hichu asim leh English 17%, Math 40%, Economics 12%, Agriculture 12%, Geography 22%, akisunin, alung ahung behseh in, “Phat atam jon TV le Mobile a naphat nasumang in, idia hiche hi neivet sah ham, nalekha sim lo ipi ham?” tin achapa asen jeng tai. Ajinun, “Khongai temin, ken sei inge” atileh aman, “Kithip thim in, nachapa nalungset bol behseh-a le kha sima hibanga thase ahi, ken ka hei. Sum leo leova lekha nakisim sah uva, nahiti bep-u ham?” anati.

Ajinun, “Chuti joh hi ham ! Ngai temin ken sei inge. Eiho in sunga koima hibanga mark lhommu aumpoi” atitai. Chuin achapan hitin aseie, “Tunia na-box kasuh tenga ahile aning khat a hiche lekha hi ana kijep ahin, amin hi kavet leh nang min ahi, hepa” ati. Apa chom khat thip beh in aumin, chuin “Kei khang lai-a chu kivaicha behseh a atui a-al jong kicho joulou, hijeh a chu Mark lhomcha kanamu ahi bouve” atin, athip doh tai.

* Thu aseie teng mijoh themmo chan sahji, thu aseie teng leh akam tama kamnaal ho khun ajou aseie nau aum jin ahi. Nakihou teng kichih thei un.

Het-a phachom ho

* Tulai tah-a natoh mubeina khat chu ahileh, 'Criminology' course hi ahi. Khangthah hon hiche course hi nasim uleh toh ding gang tah-a namu thei diu ahi. Hia hin, Crime & prevention of crime, chule Forensic ho jong apange. Diploma, Bachelor degree, Master chule Post Graduate gei aume. Asimna thei mun ho :

1. University of Pune.
2. Osmania University.
3. Gujarat University.
4. University of Madras.

* Uric Acid, Gout chule joint pain neihon lou na neh vang uva kahvah vah leh hung najap jia ahin, hijeh chun twi hadon jep angai in, chule twikhanglen nga Sardine leh sahing chule gobi pah, gobi lum ho jong ngol apha.

* Mi akhut kiloh, kithing ho hi ju adon jeh-u, dum achep jeh-u, coffee, cha ahadon jeh-u, ahiloule vitamin B 12 lhasam ahinome. Jana imut phat lhomnei jeh jong ahi thei in ahi. Thin damlou, thyroid nei jeh jong ahithej jie. Doctor phatea kivet sah angai-e.

* Ahlu (Potato) hi 17th. century a Portuguese hon ahin pohlut-u anahi. Surat leh Karnataka a 1675 A.D. lai chun ana kihatu in ahi. Chua konin aban banin ahung chalin, eihon jong ikitu tauve.

* Soda haneh ho Diabetes avei nom in ahi. Soda hi tahsa din jong apha poi. Melah-a soda lhah louding, chu le soda kilhah donthei ho chu don

lou ding hi, tahsa din aphajoi. Soda hi ngola pha jo ahi.

* 'Blessing of Goodness Healing Church' kiti Nigeria a Lagos muna houbung hi ana-asa, thilha vop dam sah thei in atahsan un, a Pastor pau hi 'Prophet' atiuvin ahi. Hiche houbung a hin adamlou ho hi ajam doh louna diuvin akengu thih-chao kikol (chain) in akan un ahi. Mi abang hi kum 5 cheng jong hitia ahenu, abang chu an angol sah-u, abol genthei-u hichu adamna diu tia abolu ahi.

Agam uva police ten amasa chun mi 108 houbung khat a konin ajalen sah un, October 2019 chun houbung chom khat a konin mi 15 ajalen sah un ahi. Adamlou hohi ama ama insungin ahung thah lut jiu danin asej ui. A prophet pau hin, hitia mi damna dia atoh hi 1986 kuma ana pat danin asej-e.

* Tulai tah a hi scientist hon, eiho chenna leiset tilou ahsi ham lha ham ahiloule Mars ham khat a mihem chenna thei ngaito ding atiuvin, aki salel lseh uve. Ahinla hiche munhoa hi eiho leiset a Gravity hi umlou ahin mihem chensah ding atiu leh hiche Gravity hi asemthu-u ngaidanin asej ui. Ichennau leiset a mihem atamtah jeh a neh le chah hahsaa, chule mu chi chivo jong akum kum a ga-hoi joulou ahitai, atiuve.

* Tulai lekha sim ho, lekha them kisa hon Universe (sangsar) kiti hi itobang ham ti nahol doh tah um ? Universe hi lum ham, bem ham, ahi loule aphenga uma ham, nahet tah !

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Miss Nemhoichong Haokip, KBC
- 2) Rev. J. Manchong (Lunpu), KCC
- 3) Rev. Lhoukholal, Kangpokpi Missn
- 4) Mrs. Veikholam, Ideal school, cipur.
- 5) Mr. Henkai Lenthang, Medziphema,
- 6) Mr. Seikholun Singsit, Kohima.
- 7) Mr. ? (Kapcha), Dimapur.
- 8) Mr. Minlen Lhungdim, Mizoram

Het-a phachom ho

* Tuchung thuso hi Assam a CAA jeh a boina aum-sao jeh le Editor pa dammo thim jeh-a hung kiso geijep ahitai. Editor pa hin asojom jom nadin, taopeh ute. Ajo chana sojom ding vang agoi. Tukai vang thuso man, peh hahsa sahon hinpe da tauvin, atitai. Editor pa hinkum alhangkai tah jeh-a, kihol mang ta lou thim hinte. Thuso sim jing ho chu pa Pathenin umpi jing taken.

* **Kum 2020 a nit ding ho :**

- Palm Sunday ... April 5
- Good Friday ... April 10
- Mother's Day ... May 10
- Pentecost Sunday May 31
- Father's Day June 21

Christian Meivah
January - February, 2020

PRINTED MATTER

To :

Editor :
Rev. M. Haokhothong,
C/o, T. Manchong
Nichols Higher Secondary School, Satrihari,
P. O. Rehabari - 781008, Guwahati, Assam.